

81. Illo *Lauhityam* transgresso, *Prágjyotishensium* dominus contremuit, una cum agallochi arboribus, quæ elephantis alligandis postium vice fungebantur.

82. Non tulit rex ille pulverem ab illius curru excitatum, qui solem involvit, atque tempestatem sine pluvia effecit; nedum illius vexillum.

83. *Kámarúpensium* dominus illum, fortitudine sua ipso INDRA superiorem, donavit elephantis, quorum tempora fissa erant, et quorum ope ipse alios reges superaverat.

84. *Kámarúpensium* rex illius pedum umbram, quasi sellulæ aureæ deam tutelarem, gemmis, quasi floribus oblatis, veneratus est.

85. Ita cum victor ille plagas devicisset, rediit, pulverem a curru excitatum in regum diademata, umbellis destituta, cadere sinens.

86. Instituit ille sacrificium *Visvajit* appellatum, in quo omnes suas opes sacerdotibus dispertiit: nam boni, nubium instar, non accipiunt nisi ut largiantur.

87. Sub sacrificii finem RAGHUS cum ministris suis, postquam cladis dolorem magnis honoribus sublevasset, *Kshatriyos*, quorum uxores ob diuturnam separationem desiderio languebant, dimisit ut in urbes suas reverterentur.

88. Illi regis pedes, lineis suis vexillum, fulmen atque umbellam referentes, nec nisi ipsius benevolentia attingendos, cum discessuri sese prosternerent, per mel et pulverem e capitum coronis decidentia in digitis flavos reddiderunt.